

La Quotidiana 10-4-2015, p. 5

## Per la nunvalaiudad d'ina iniziativa

■ (cp) La fracziun da la Partida cristian-democratica (pcd) en il cussegl grond è sa radunada – sut il presidi da deputà *Marcus Caduff* – a Falera per sa preparar sin la sessiun d'avrigl. Tar las fatschentas principalas da quella s'auda l'iniziativa pertutgant linguas estras. Quella vul ch'en scola primara duaja sulet in linguatg ester esser obligatoric – tut tenor regiun linguistica: il tudestg u l'anglais. La fracziun da la pcd parta l'opiniun da sia cumissiun per furmaziun e cultura – presidiada da deputà *Luca Tenchio* – che questa iniziativa saja da declarar per nunvalaivla. Tenor la costituziun chantunala ha il cussegl grond numnadamain da declerar iniziativas, che cunterfan a la costituziun chantunala, per nunvalaivlas perquai ch'ellas stattan en cuntradiziun evidenta cun il dretg federal surordinà e la costituziun chantunala.

«Scolaras e scholars ord las regions rumantschas e talianas vegnan discriminads cun questa iniziativa en lur linguatg. Quella effectuescha cumpetenzas inegualas pertutgant ils linguatgs esters», ha declerà deputà Tenchio. Questa iniziativa violeschia era la costituziun chantunala, siond ch'il linguatg tudestg survegnia bler dapli paisa visavi il rumantsch e talian. Era cuntrafa quai a la costituziun chantunala tenor la quala ils trais linguatgs chantunals èn eguals. Plinavant na fissi betg pli pussaivel en tschertas vischnancas da resguardar las minoritads linguisticas tradiziunalas tenor la costituziun chantunala. La fracziun da la pcd è perquai cleramain da l'opiniun che questa iniziativa saja da declerar per nunvalaivla, essend ch'ella violeschia tant il dretg federal sco la costituziun chantunala. Indispitaivla è stada per la fracziun l'entrada en la cunvegna interchantunala davart renconuscher ils diploms da scolaziun e la revisiun parziala concernent ils dretgs politics. Questa revisiun preveda la via giuridica tar la dretgira administrativa per ils messadis (decleraziuns) dal cussegl grond davart votaziuns.

Sustegnida cleramain è vegnida la proposta da deputà *Daniel Albertin* pertutgant la coesiun societara en il chantun cun promover l'infurmaziun tranter las cuminanzas linguisticas.